

09 MAY 2001

DAIM-MAHATHIR

DAIM SIFATKAN MAHATHIR SEBAGAI PEMIKIR GLOBALISASI YANG BAIK

KUALA LUMPUR, 9 Mei (Bernama) -- Menteri Kewangan Tun Daim Zainuddin hari ini menyifatkan Perdana Menteri Datuk Seri Dr Mahathir sebagai seorang yang menerima globalisasi dengan semangat yang tinggi dan merupakan seorang penggerak reformasi yang beriltizam serta pemikir yang baik mengenai isu tersebut.

Kata beliau, walaupun ada orang yang mendokong proses globalisasi, namun ini tidak mengecualikan atau menghalang mereka daripada menyuarakan pandangan lain tentang bagaimana globalisasi harus dilaksanakan.

Malangnya, sesetengah orang masih tidak boleh bertolak ansur apabila pandangan tidak orthodox disuarakan, walau dalam apa semangat sekalipun ia dibuat, kata Daim dalam ucaptamanya bertajuk "Globalisasi? Cabaran Pembangunan Baru Muncul: Isu Baru Agenda Lama" pada Persidangan Bank Pembangunan Asia di Honolulu. Teks ucapan beliau telah dikeluarkan di sini hari ini dan juga boleh didapati melalui laman web Majlis Tindakan Ekonomi Negara -- neac.gov.my.

Daim berkata, "Pada satu hari, saya merasa gelihati membaca satu tulisan yang agak tidak memberangsangkan mengenai Malaysia dan Perdana Menteri kami. Ia memberikan sedikit hiburan. Saya petik tulisan itu: +Mahathir Mohamad, yang pada keseluruhannya terlalu memusuhi pelabur dan pasaran barat, masih lagi menjadi Perdana Menteri dan kroninya masih tidak berubah.+

"Saya kenal rapat dengan Dr. Mahathir, dan saya boleh beri jaminan kepada anda bahawa beliau merupakan penggerak reformasi yang beriltizam serta pemikir yang baik dan pandangannya yang keras kadang-kadang tidak digemari oleh pihak akhbar.

"Beliau yang dahulunya disifatkan sebagai "gigih" dan "pintar" kemudiannya menjadi "duri" dan "keras kepala". Dr. Mahathir menerima globalisasi dengan semangat yang tinggi seperti juga anda semua walaupun baru-baru ini beliau mempunyai sedikit keraguan tentang cara perjalanan dan faedah-faedah globalisasi, khususnya berhubung dengan kesan ke atas ekonomi yang kurang maju." -- BERNAMA

SHY SHY KY OS